

**O‘ZBEKISTON RESPUBLIKASI PREZIDENTINING
QARORI**

**TOSHKENT SHAHRIDA “D.I. MENDELEYEV NOMIDAGI ROSSIYA KIMYO-
TEKNOLOGIYA UNIVERSITETI” FEDERAL DAVLAT BUDJETI OLIY TA’LIM
MUASSASASI FILIALINI TASHKIL ETISH TO‘G‘RISIDA**

Respublika iqtisodiyotining sanoat tarmoqlari uchun malakali kadrlar tayyorlashni yanada takomillashtirish, oliy ta’lim sohasidagi xalqaro hamkorlikni kengaytirish, shuningdek, 2018-2019-yillarda O‘zbekiston Respublikasi va Rossiya Federatsiyasi o‘rtasida siyosiy, savdo-iqtisodiy, investitsiyaviy, transport-kommunikatsiyaviy va madaniy-gumanitar hamkorlikni yanada kengaytirish bo‘yicha kelishuvlarni amalga oshirish yuzasidan amaliy tadbirlar rejasi (“Yo‘l xaritasi”)ni ijro etish maqsadida:

1. O‘zbekiston Respublikasi Oliy va o‘rta maxsus ta’lim vazirligi, “O‘zkimyosanoat” AJ va “D.I. Mendeleev nomidagi Rossiya kimyo-texnologiya universiteti” Federal davlat budjeti oliy ta’lim muassasasining (Rossiya Federatsiyasi) (keyingi o‘rinlarda — Universitet) Toshkent shahrida “D.I. Mendeleev nomidagi Rossiya kimyo-texnologiya universiteti” Federal davlat budjeti oliy ta’lim muassasasi filialini tashkil etish to‘g‘risidagi taklifga rozilik berilsin (keyingi o‘rinlarda — Filial).

2. Quyidagilar Filial faoliyatining asosiy yo‘nalishlari etib belgilansin:

respublikaning sanoat tarmoqlaridagi muhim ilmiy-texnologik vazifalarni hal etishga qodir bo‘lgan yuqori malakali muhandis-texnik kadrlarni xalqaro ta’lim standartlariga muvofiq tayyorlash; nanomateriallar kimyoviy texnologiyasi, materialshunoslik va materiallarni korroziyadan saqlash, materiallarga badiiy ishlov berish texnologiyasi va sanoat ishlab chiqarishining boshqa sohalarida fundamental va amaliy ilmiy tadqiqotlar olib borish;

ta’lim hamda ilm-fanning uzluksizligi va izchilligi, shuningdek, ularni jahon ta’limi va ilm-fani hamjamiyatiga integratsiya qilish hisobiga mutaxassislar va ilmiy-pedagogik kadrlarni tayyorlash, qayta tayyorlash va malakasini oshirish;

muhandis-texnik va ilmiy kadrlar tayyorlash tizimini takomillashtirish va modernizatsiya qilishga yo‘naltirilgan yangi ta’lim dasturlari hamda o‘qitish shakllarini ishlab chiqish va tatbiq etish; ta’lim, ilm-fan va ishlab chiqarishning yaqin integratsiyalashuvi uchun shart-sharoitlar yaratish;

ilmiy-pedagogik salohiyatning rivojlanishini qo‘llab-quvvatlash, pedagogik texnologiyalar va o‘qitish usullarini faol takomillashtirish;

ta’lim hamda ilmiy-texnikaviy sohalarida xorijiy mamlakatlarning yetakchi ta’lim muassasalari, ilmiy-tadqiqot markazlari va biznes hamjamiyati bilan uzoq muddatli munosabatlarni rivojlantirish va mustahkamlash.

3. Belgilansinki:

Filial Universitetning alohida tarkibiy bo‘linmasi — oliy ta’lim muassasasi hisoblanadi;

Filial, Universitet bilan kelishgan holda, ta’limning bakalavriat yo‘nalishlari va magistratura mutaxassisliklarining kadrlarga bo‘lgan ehtiyojini hisobga olib, barcha darajalardagi mutaxassislarni tayyorlash, qayta tayyorlash, malakasini oshirish, shu jumladan ilmiy-pedagog kadrlarni tayyorlash ishlarini amalga oshiradi;

Filialda o‘qitish rus tilida, Rossiya Federatsiyasining federal ta’lim standartlariga muvofiq O‘zbekiston Respublikasi Oliy va o‘rta maxsus ta’lim vazirligi bilan kelishilgan holda Universitet tomonidan tasdiqlangan o‘quv rejaları va dasturlar asosida amalga oshiriladi;

Filialning ta’lim faoliyati 2019/2020 o‘quv yilidan boshlanadi;

Filialga abituriyentlarni qabul qilish, ta’lim faoliyati va Filial bitiruvchilarini attestatsiyadan o‘tkazish O‘zbekiston Respublikasi Oliy va o‘rta maxsus ta’lim vazirligi bilan kelishilgan holda Universitet tomonidan belgilanadigan talab, tartib va muddatlarga muvofiq amalga oshiriladi;

Filial bitiruvchilariga o‘qishni bitirganlaridan so‘ng O‘zbekiston Respublikasida oliy ta’lim to‘g‘risidagi hujjat sifatida tan olinadigan belgilangan namunadagi diplom beriladi.

4. Ma'lumot uchun qabul qilinsinki:

a) Universitet quyidagilarni ta'minlashda ko'maklashadi:

o'quv jarayoniga ilg'or pedagogik va axborot texnologiyalari, fan va texnikaning eng yangi yutuqlarini joriy etish;

Filial mutaxassislarining malakasini oshirish va professor-o'qituvchilar tarkibini qayta tayyorlash;

Filial kutubxona fondini shakllantirish hamda uni zamonaviy o'quv, o'quv-uslubiy va ilmiy-texnikaviy adabiyotlar bilan to'ldirish;

b) Toshkent kimyo-texnologiya instituti Filialning akademik hamkori hisoblanadi va u:

Filialning professor-o'qituvchilari tarkibini shakllantirishga ko'maklashadi;

ilmiy-metodik yordam ko'rsatadi va laboratoriya va ilmiy-tadqiqot ishlarini bajarish uchun laboratoriya xonalari, o'quv adabiyotlari va uskunalarni beg'araz asosda taqdim etadi.

5. Quyidagilar:

Toshkent shahridagi "D.I. Mendeleev nomidagi Rossiya kimyo-texnologiya universiteti" Federal davlat budjeti oliy ta'lim muassasasi filialida kadrlar tayyorlash bo'yicha bakalavriat ta'limining asosiy yo'nalishlari va magistratura mutaxassisliklari [1-ilovaga](#) muvofiq;

Toshkent shahridagi "D.I. Mendeleev nomidagi Rossiya kimyo-texnologiya universiteti" Federal davlat budjeti oliy ta'lim muassasasi filialining Vasiylik kengashi tarkibi (keyingi o'rinlarda — Vasiylik kengashi) [2-ilovaga](#) muvofiq;

Toshkent shahridagi "D.I. Mendeleev nomidagi Rossiya kimyo-texnologiya universiteti" Federal davlat budjeti oliy ta'lim muassasasi filialini tashkil etish bo'yicha Tashkiliy komissiya tarkibi [3-ilovaga](#) muvofiq ma'qullansin.

6. Tashkiliy komissiya:

2019-yil 1-avgustga qadar Filialni joylashtirish bo'yicha bino va inshootlardagi zarur ta'mirlash va jihozlash ishlarini amalga oshirsin, shuningdek, Filial talabalari va o'qituvchilari yashashi uchun yotoqxona tayyorlasin;

2019-yil 25-avgustga qadar Filialni joylashtirish hamda uni zarur mebel, inventar, zamonaviy o'quv va laboratoriya uskunalari, kutubxona fondi, kompyuter va boshqa orgtexnika bilan ta'minlansin.

7. Belgilab qo'yilsinki:

a) Filialga qabul kvotalari manfaatdor vazirlik va idoralarning tegishli kadrlarga bo'lgan ehtiyojini hisobga olib, Universitet hamda O'zbekiston Respublikasi Oliy va o'rta maxsus ta'lim vazirligi bilan kelishilgan holda, Filial Vasiylik kengashining qarori bilan tasdiqlanadi;

davlat granti asosida ta'lim olgan Filial bitiruvchilari respublika tashkilotlariga besh yildan kam bo'lmagan muddatga majburiy ishlab berish sharti bilan ishga taqsimlanadi;

b) Filial faoliyatini moliyalashtirish:

talabalarni davlat grantlari bo'yicha o'qitish uchun O'zbekiston Respublikasi Oliy va o'rta maxsus ta'lim vazirligiga ajratiladigan O'zbekiston Respublikasi Davlat budjeti mablag'lari hisobidan, biroq Filialga o'qishga qabul qilinadigan talabalar umumiy sonining 40 foizidan ortiq bo'lmagan miqdorda;

talabalarni to'lov-kontrakt asosida o'qitishdan tushadigan mablag'lar;

Vasiylik kengashi qarorlari asosida shakllantiriladigan pul mablag'lari, yuridik va jismoniy shaxslarning homiylik xayriyalari hamda maqsadli badallari;

xalqaro moliya institutlari grantlari;

qonun hujjatlarida taqiqlanmagan boshqa manbalar hisobidan amalga oshiriladi.

8. Filial Toshkent shahri, Mirzo Ulug'bek tumani, TTZ-1 mavzesi, 47-uyda joylashgan Mirzo Ulug'bek sanoat kasb-hunar kolleji binosiga bepul foydalanish huquqi asosida joylashtirilsin.

Belgilab qo'yilsinki, Mirzo Ulug'bek sanoat kasb-hunar kolleji o'quvchilari o'quv jarayonini Mirzo Ulug'bek sanoat kasb-hunar kolleji binosida o'qishlari bitgunga qadar davom ettiradilar.

9. "O'z kimyosanoat" AJ korxonalarining ularning mablag'lari hisobidan Filialni tashkil etish, uning moddiy-texnika va o'quv bazasini shakllantirish bilan bog'liq tashkiliy tadbirlarni, shu

jumladan bino va inshootlarini rekonstruksiya qilish, kapital ta'mirlash, zarur mebel, inventar, zamonaviy o'quv va laboratoriya uskunalari, kompyuter va boshqa orgtexnika, kutubxona fondi bilan ta'minlash ishlarini moliyalashtirish to'g'risidagi taklifi ma'qullansin.

10. Belgilab qo'yilsinki, Filialga Universitetdan jalb qilinadigan professor va o'qituvchilarning xizmat safari xarajatlari o'quv jarayonining ehtiyojlaridan kelib chiqib, tuzilgan shartnomalarga muvofiq amalga oshiriladi.

11. Filialga o'qituvchilik va ilmiy faoliyat olib borish uchun taklif etiladigan xorijlik professor-o'qituvchilarning yashash hamda transport xarajatlarini tuziladigan shartnomalar asosida, O'zbekiston Respublikasi fuqarolari uchun belgilangan tariflarda to'lashga ruxsat berilsin.

12. Belgilansinki, Filial ta'minoti uchun budjet ajratmalari 2019-yilda O'zbekiston Respublikasi Davlat budjetining ijtimoiy soha bo'yicha tasdiqlangan xarajatlar parametrlari doirasida ajratiladi, 2020-yildan boshlab esa mazkur sohaning yillik xarajatlar parametrlarida nazarda tutiladi.

13. O'zbekiston Respublikasi Oliy va o'rta maxsus ta'lim vazirligi, Universitet va "O'zkimyosanoat" AJ bilan hamkorlikda:

ikki oy muddatda ta'xis hujjatlari ishlab chiqilishi va kelishilishi, Filialning belgilangan tartibda davlat ro'yxatidan o'tkazilishi va uning tashkiliy tuzilmasi tasdiqlanishi;

2019-yil 1-avgustga qadar Filialning tanlov asosida malakali professor-o'qituvchilar tarkibi bilan to'ldirilishini ta'minlasin.

14. Filialga ikkita yengil avtotransport, jumladan bitta xizmat va bitta navbatchi avtotransport vositasini saqlashga limit ajratilsin.

15. O'zbekiston Respublikasi Tashqi ishlar vazirligi Oliy va o'rta maxsus ta'lim vazirligi hamda Filial buyurtmanomalariga binoan mazkur qarorni amalga oshirish doirasida jalb qilinadigan xorijiy professor-o'qituvchilar tarkibi va ma'muriy xodimlar hamda ularning oila a'zolari uchun kirish vizalari konsullik hamda boshqa yig'imlar undirilmadan, belgilangan tartibda rasmiylashtirilishini ta'minlasin.

16. O'zbekiston Respublikasi Ichki ishlar vazirligi Oliy va o'rta maxsus ta'lim vazirligi hamda Filial buyurtmanomalariga binoan mazkur qarorni amalga oshirish doirasida jalb qilinadigan xorijiy professor-o'qituvchilar tarkibi va ma'muriy xodimlar hamda ularning oila a'zolari uchun davlat boji undirilmadan belgilangan tartibda ko'p martalik vizalar berilishi va uzaytirilishini, shuningdek, ularning yashash manzillari bo'yicha vaqtinchalik ro'yxatdan o'tkazilishi hamda uning muddati uzaytirilishini ta'minlasin.

17. O'zbekiston Respublikasi Bandlik va mehnat munosabatlari vazirligi Oliy va o'rta maxsus ta'lim vazirligi hamda Filial buyurtmanomalariga binoan chet el fuqarolariga O'zbekiston Respublikasi hududida mehnat faoliyatini olib borish uchun tasdiqnomalar berilishini (muddati uzaytirilishini) ta'minlasin.

18. 2022-yil 1-iyunga qadar Filial faoliyatini ta'minlash va uni jihozlash uchun belgilangan tartibda shakllantiriladigan ro'yxatlar bo'yicha olib kelinadigan, O'zbekiston Respublikasida ishlab chiqarilmaydigan o'quv va ilmiy laboratoriya jihozlari, kompyuter texnikasi, dasturiy mahsulotlar, o'quv va ilmiy-metodik adabiyot, inventar va moddiy-texnik resurslar bojxona to'lovlaridan (bojxona yig'imlaridan tashqari) ozod etilsin.

19. Oliy va o'rta maxsus ta'lim vazirligi manfaatdor vazirlik va idoralar bilan birgalikda ikki oy muddatda qonun hujjatlariga ushbu qarordan kelib chiqadigan o'zgartirish va qo'shimchalar to'g'risida O'zbekiston Respublikasi Vazirlar Mahkamasiga takliflar kiritilsin.

20. Mazkur qarorning ijrosini nazorat qilish O'zbekiston Respublikasi Prezidenti maslahatchisi A.A. Abduvaxitov va O'zbekiston Respublikasi Bosh vazirining o'rinbosari A.A. Abduhakimov zimmasiga yuklansin.

O'zbekiston Respublikasi Prezidenti Sh. MIRZIYOYEV

Toshkent sh.,
2019-yil 7-iyun,
PQ-4352-son

**Toshkent shahridagi “D.I. Mendeleev nomidagi Rossiya kimyo-texnologiya universiteti”
Federal davlat budjeti oliy ta’lim muassasasi filialida kadrlar tayyorlash bo‘yicha bakalavriat
ta’limining asosiy yo‘nalishlari va magistratura mutaxassisliklari**

Bakalavriat ta’lim yo‘nalishlari

1. Materialshunoslik, nanomateriallar va nanotizimlar texnologiyalari
2. Materiallarga badiiy ishlov berish texnologiyasi;
3. Sintetik biologik faol moddalar, kimyo-farmatsevtika preparatlari va pardozi vositalari texnologiyasi;
4. Texnologik jarayon va ishlab chiqarish xavfsizligi.

Magistratura mutaxassisliklari:

1. Materialshunoslik va materiallarni korroziyadan saqlash;
2. Nanomateriallar kimyoviy texnologiyasi.

Izoh. Bakalavriat ta’lim yo‘nalishlari va magistratura mutaxassisliklari ro‘yxatiga Vasiylik kengashi tomonidan buyurtmachi tashkilotlarning kadrlarga bo‘lgan ehtiyojlarini inobatga olib, O‘zbekiston Respublikasi Oliy va o‘rta maxsus ta’lim vazirligi hamda Toshkent shahridagi “D.I. Mendeleev nomidagi Rossiya kimyo-texnologiya universiteti” Federal davlat budjeti oliy ta’lim muassasasi bilan kelishilgan holda o‘zgartirish va (yoki) qo‘shimchalar kiritilishi mumkin.

**Toshkent shahridagi “D.I. Mendeleev nomidagi Rossiya kimyo-texnologiya universiteti”
Federal davlat budjeti oliy ta’lim muassasasi filialining Vasiylik kengashi**

TARKIBI

1. O.Sh. Temirov — “O‘zkimyo sanoat” AJ boshqaruvi raisi, Vasiylik kengashi raisi
2. I.U. Majidov — O‘zbekiston Respublikasi oliy va o‘rta maxsus ta’lim vaziri, Vasiylik kengashi raisining o‘rinbosari
3. A.X. Kamilov — O‘zbekiston Respublikasi tashqi ishlar vaziri
4. B.B. Ashrafxonov — O‘zbekiston Respublikasi moliya vazirining o‘rinbosari
5. B.Sh. Usmonov — O‘zbekiston Respublikasi iqtisodiyot va sanoat vazirining o‘rinbosari
6. B.K. Zaripov — “O‘zsanoatqurilish materiallari” uyushmasi raisi
7. U.X. Sayidov — “O‘zbekneftgaz” AJ boshqaruvi raisining birinchi o‘rinbosari
8. A.G. Majuga — “D.I. Mendeleev nomidagi Rossiya kimyo-texnologiya universiteti” Federal davlat budjeti oliy ta’lim muassasasi rektori (kelishilgan holda)
9. Lavozimiga ko‘ra — Toshkent shahridagi “D.I. Mendeleev nomidagi Rossiya kimyo-texnologiya universiteti” Federal davlat budjeti oliy ta’lim muassasasi filiali rahbari
10. Sh.Ch. Aslanov — “Sho‘rtangaz kimyo majmuasi” MChJ direktori
11. U.T. Isroilov — “Uz-KorGasChemica” MChJ qo‘shma korxonasi boshqaruvi raisi
12. Sh.A. Mutalov — Toshkent kimyo-texnologiya instituti rektori

Izoh. Vasiylik kengashi a'zolari boshqa ishga o'tgan taqdirda, uning tarkibiga ushbu lavozimlarga yangidan tayinlangan yoki zimmasiga tegishli funksiyalarni bajarish yuklatilgan shaxslar kiritiladi.

O'zbekiston Respublikasi Prezidentining 2019-yil 7-iyundagi PQ-4352-son qaroriga
3-ILOVA

**Toshkent shahridagi “D.I.Mendeleyev nomidagi Rossiya kimyo-texnologiya universiteti”
Federal davlat budjeti oliy ta'lim muassasasi filialini tashkil etish bo'yicha Tashkiliy
komissiya**

TARKIBI

1. I.U. — O'zbekiston Respublikasi oliy va o'rta maxsus ta'lim vaziri, Tashkiliy
Majidov komissiya raisi
2. B.Sh. — O'zbekiston Respublikasi iqtisodiyot va sanoat vaziri o'rinbosari, Tashkiliy
Usmonov komissiya raisi o'rinbosari
3. I.T. — O'zbekiston Respublikasi tashqi ishlar vazirining birinchi o'rinbosari
Ne'matov
4. Sh.M. — O'zbekiston Respublikasi axborot texnologiyalari va kommunikatsiyalarini
Sadikov rivojlantirish vaziri
5. Lavozimi — O'zbekiston Respublikasi qurilish vaziri
bo'yicha
6. M.B. — O'zbekiston Respublikasi Davlat bojxona qo'mitasi raisi
Azimov
7. O.Sh. — “O'zbekkimyosanoat” AJ boshqaruvi rais
Temirov
8. U.X. — “O'zbekneftgaz” AJ boshqaruvi raisining birinchi o'rinbosari
Saidov
9. J.A. — Toshkent shahar hokimi
Ortiqxo'jayev
10. — “D.I.Mendeleyev nomidagi Rossiya kimyo-texnologiya universiteti” Federal
Lavozimiga davlat budjeti oliy ta'lim muassasasifiliali (kelishilgan holda)
ko'ra
11. Sh.Ch. — “Sho'rtangazkimyo majmuasi” MChJ direktori
Aslanov
12. U.T. — “Uz-KorGasChemica” MChJ qo'shma korxonasi boshqaruvi raisi
Isroilov
13. Sh.A. — Toshkent kimyo-texnologiya instituti rektori
Mutalov

Izoh. Tashkilish komissiya a'zolari boshqa ishga o'tgan taqdirda, uning tarkibiga ushbu lavozimlarga yangidan tayinlangan yoki zimmasiga tegishli funksiyalarni bajarish yuklatilgan shaxslar kiritiladi.

(Qonun hujjatlari ma'lumotlari milliy bazasi, 07.06.2019-y., 07/19/4352/3245-son)